

<County: Lancashire>

<Code: L0586b>

<MS reference: Oxford, Bodleian Library, Rawlinson B 460, fols 93v.12-96r.21>

<Text: Award>

<fol. 93v><line 12>**The grete endentur~ of ye mosse betuen@ sir John Buron@ and sir John of Assheton@ awardet be sir John of Stanley**<blank line follows>

This endentur~ beres wittenes y^t yer as John of Asshetonn Knyght for him & his opon y^t on partie and John Buron@ knyght for him & his opon y^t oyer partie and also Thomas of Assheton@ son of y^e said John@ of Asshetonn for him and his opon on partie and Richard y^e Buron@ son@ of y^e said John y^e Buronn opon an-oyer partie ben put in y^e award ordenaunce arbitrement of me John of Stanley kny3t of al maner debates accomns & quereles hade oyer mevet betwene y^e parties before said fro ye begynnyng of y^e word vnto y^e tyme of y^e submissione of y^e said award yer-opon J y^e said John of Stanley knowyng y^t y^e . [<?>] accomns & variaunce3 aforsaid han ben@ stiret & meuet before y^e hegh Councell of ynglond and sithen before y^e honourable lordes Thomas Byssshop of Duresme and Richard Erle of Warwik and be yair~ comaundment & desire J toke yis a-ward opon me to deme as fer as my wyte strecches

<fol. 94r>wherfore J haue herd all ye chalenge3 & onsuares titles & claymes of y^e said parties be gode dilibaconn and yer-opon J ordenn deme & a-ward y^t y^e said John of Assheton & John ye Buronn Thomas of Assheton@ & Richard y^e Buron@ for thayme & yaire3 ben full frendes and as to y^e trespas donn to Willam of y^e Crosse y^t y^e said Richard ye buron@ pay for him & his felischip y^t didn@ yat trespas to ye said willam vj s~ viij d at y^e festes of Mydsomer and Martynmas next comyng be even porcouns And also to Gregore of Berdisley for trespas donn to him xx s~ at y^e said festes and also to Roger y^e Cropper for trespas donn to him xiiij s~ iiij d at y^e said festes and also to Thomas of y^e leghes for trespas donn to him l s~ at y^e said festes Also J ordenn & award yat y^e said John y^e Buronn delyuer to Richard y^e Hunt an obligacoun in y^e quech he is bounden in-to y^e said John y^e Buron@ in xx marc~ oyer els y^t y^e said John y^e Buronn relese his accomn of y^t obigacon@ to y^e said Richard y^e hunt betwene yis and y^e fest of Saynt petre y^t is cald aduincula next comyng

Also J a-ward y^t y^e said Ric~ y^e Buronn pay to y^e said John of Asshetonn &
 Thomas his son for trespas donn to yaim in comyng to y^e tovne of Asshetonn
 at y^e said festes of Mydsomer and Martinmas be even@ porcouns xx marc~ Also J y^e said John of
 Stanley orden deme & award y^t y^e said John of
 Assheton@ delyuer to y^e said John y^e Buronn ij obligacouns ayther of CC li
 in y^e which y^e said John y^e Buron@ is bounden Jn-to y^e said John of
 Assheton@ oyer els y^t y^e said John of Assheton@ relese al his accon@ y^t he
 may haue be vertue of y^e said obligacounes to y^e said John y^e Buronn
 Betwene yis & y^e said fest of Saynt petre Also J orden & a-ward y^t
 y^e said John of Assheton@ make & get Thomas of Asshetonn bastard
 to pay to Raulynn y^e Tayliour for trespas donn to him x s~ at y^e said
 festes of Mydsomer & Martynmas be evenn porcouns Also J deme
 and a-ward y^t y^e said John of Asshetonn make & get y^e said Thomas
 of Asshetonn bastard to pay to y^e said John y^e Buronn for y^e brekyng
 <fol. 94v>y^e maner of Boterworth and sechyng his tenante³ and seruante³ A hoggeshede
 Of wyne or ij marc~ at y^e said fest of Missomer Also y^t y^e said John of Asshetonn
 make and get y^e said Thomas of Assheton@ bastard to pay to Thomas Knott
 for trespas done to him vj s~ viij d at y^e said festes of missomer & martynmes
 Also J a-ward y^t y^e said Thomas of Assheton@ son and ayre of y^e said John of
 Asshetonn pay to y^e said Richard y^e Buron@ for trespas donn to him at two
 tymes a tersyll of a Goshauke at y^e said fest of Missomer or within xl dayes
 yen next folowyng Also J deme & a-ward y^t y^e said Thomas of Assheton@
 son and heire of y^e said John of Asshetonn pay to y^e said John y^e Buron@
 & Richard his son for trespas done to yaime be y^e same Thomas & his felissip
 at y^e Maner of Clayton@ at y^e said festes of Missomer & Martynmas xx li be evenn
 porcouns Also J a-ward y^t y^e said John of assheton@ make & gete y^e said Thomas
 of Asshetonn bastard to pay to y^e said Richard y^e Buron@ for trespas done to
 him in comyng to Cowleshagh xiiij s~ iiij d at y^e said festes of Missomer and
 Martynmas be evenn porcouns And be-cause y^t gret variaunce has ben hade
 betwene y^e said John of Assheton@ & y^e said John y^e Buronn of meres and
 boundes betwene Asshetonn mosse & Drylesdene mosse yer J orden deme &
 award y^t ye said John y^e Buron@ and his heire³ & assignes shal haue & hold
 for euer-more in fee simple for yaim & thaire tennte³ y^t ben & shal+be in Drilesden@
 Claytonn and Synderlond y^e grounde & mosse within yies meres y^t is to
 wytt fro y^e heued of ye lomyliche suyng by y^e bordour of y^e mosse
 toward aldewynshagh vn-to y^e dich y^t Thomas of Asshetonn made
 opon y^t partie of y^e mosse so suyng y^t dych vnto y^e hardhyll y^t y^e said
 John of Assheton@ sais is nowe cald Thomas hill of Assheton@ &
 y^e whiche hyll y^e said John y^e Buron@ sais is cald y^e hard-hyll be-syde

Oselach in Drylesdene more and so suyng vp Estward be y^e hard syde of
 y^e said hyll fully x rodes and fro y^e est end of yose x rodes suyng streght
 opon y^e end of y^e ouermast dyche . ^[Estward] y^t y^e said John y^e Buronn has in Synde^[r]lond
 toward y^e lytell mosse even to y^e same end of y^e same dyche except
 <fol. 95r>xl rodes and fro yens ouertwart y^e same mosse northe-ward evenn to y^e vtmast
 egge of y^e same mosse northe-ward sawyng to y^e said John of Assheton@ and
 his heire3 y^e Jntak y^t he has taken in yer as fer as hit is dychet and fro yens
 suyng dovne y^e egge of y^t mosse even to y^e said heued of y^e said lomylach
 3eldyng yerof 3erely for ye dowte and awer aforsaid y^e said John y^e Buron@
 and his heire3 to y^e said John of Assheton@ and his heire3 xij s~ at y^e festes
 of Myssomer and Martynmes be evenn porcouns Also J award y^t y^e said John
 of Assheton@ and his heire3 for thayme and yaire teante3 & yaire assignes
 shall haue and hold for euermore if fee symple all y^e remenant of y^e
 said mosse yat y^e said John y^e Buronn claymes fro y^e said diche yat y^e said
 Thomas of Assheton@ made vnto y^e Ewall Also J award y^t y^e partie3 beforesaid
 entre hold and haue to yaime and to yaire heire3 in Fee symple y^e parcels
 of y^e said mosses ayther partie yaire parcell in seueralte like as hit is afore
 lymytt and also as J y^e said John of Stanley shall mere thaym withe
 stakes hole3 and oyer merkes more redyle opon ye grounde by goddes mercy
 in y^e same fourme betwene yis and y^e fest of saynt Michell next
 comyng Also J a-ward y^t after y^t J haue so meret y^e said parcels of y^e
 said mosse opon y^e ground y^t yen y^e said John of Asshetonn and thomas
 his sonn shall make oyer make to make y^e said John y^e Buronn & his heire3
 als seure of y^t parcell of y^e said mosse yat is lymyt to hym as y^e said
 John of Stanley wil best ordenn & devise als clerely dyscharget and
 noght encombret by y^e will of y^e said John of Asshetonn of al maner
 charge3 accouns & entrees as hit is y^e day of y^e makyng of yie3 endenture3
 with-oute fraude oyer male engyne except y^e said rent afore reseruet
 And . ^[y^t] yen y^e said John y^e Buron@ and richard his son@ make oyer make to
 make y^e said John of Asshetonn his heire3 and assignes als seure of
 y^t parcell of y^e said mosse y^t is lymyte to hym and of y^e said rent afore
 reseruet as J y^e said John of Stanley wil best ordene and devise .
 <fol. 95v>als clerely dyscharget and noght encombret of al maner Charge3 acconns &
 entrees be y^e wil of y^e said John y^e Buronn as hit is y^e day of y^e makyng
 of yies endenture3 With-oute fraude oyer male engyne ordent al-ways
 & demet be me y^e said John of Stanley y^t y^e said Drye-hyll lye open@
 for euermore noght to be enprowet ne encloset be y^e said John of Assheton@
 ne Thomas his son@ thair~ heire3 ne assignes and y^t y^e said partie3 and
 thaire heire3 and y^e assignes of y^e said John of Assheton@ & of his heire3

may haue wayes sufficient opon yat said hard-hyll to carye and
 recarye Turve³ and oyer caryages at yair~ lust as fer as yaime like³
 and also y^t y^e said John of Assheton his heire³ & assignes shal haue
 Wayes resonable ouer al y^e remenaunt of drylesdene more y^t nowe
 lyes oponn noght enprowet ne encloset westward fro y^e said dych
 y^t y^e said Thomas of Assheton@ made to carye & recarye turves & other
 caryages as fer as yaime likes also be-cause y^t y^e said John of Asshetonn
 & his fader haue sold turves and y^e said johnn y^e Buron@ & his
 fader haue sold no turve³ as J am enfourmet opon y^e said mosse
 yerfore J ordenn & award y^t y^e said John y^e Buronn ne his heire³ selle
 ne gif no leue to delue turves in tyme comyng opon@ y^e said mosse
 to no persouns yat haue boght oyer shall bye turves of ye said John of
 Assheton@ there lest yat sale shuld cast dovne y^e mosse rent y^t
 y^e said John of Assheton@ is possessionet of as yis tyme ne to non@
 oyer persouns oute-taken@ alonly to y^e forsaid tenante³ of y^e said John
 y^e Buron@ & of his heire³ & assignes also J ordene and award y^t y^e said
 John of Asshetonn his heires oyer assigne³ put oute & remewe away for
 euermore all y^e persouns y^t haue rowmes in y^e said mosse by his setting
 assignement oyer ordenaunce oyer by hys depute³ within y^t parcell yat
 is yus assignet to y^e said John y^e Buronn and his heire³ fro yaire
 rowme³ with-oute setting oyer puttyng any persoun yere a3ayne oyer
 <fol. 96r>that yai oyer any of thayme yider come agayne be-cause of any setting other
 assignement of y^e said John of Assheton@ his assignes oyer deputes made
 Also J ordene & award y^t all y^e persouns yat benn partie to yis award in
 whose name³ othes ben profret of excusacon@ before me to be made y^t
 yai make yair~ othes and alle y^e partie³ to kysse at such tymes as J
 shal lymyt thayme to be made and all yis . [forsaid] award with my correcon@
 yer-of if nede be J ordene & award to be truly faithefully frendely &
 eisyle perfourmet in all poyntes and y^e entent yerof als wele opon
 payne of reprefe of y^e othes and assuraunce y^t y^e said partie³ haue made
 to perfourme myne award as oponn payne of y^e bondes y^t yai arn bounden@
 in yerfore ouer all yis be hit knawen to all . [true] cristen men y^t at y^e request
 of y^e best frendes of gret discrecon@ of ye said parties and by y^e Avise of y^e
 best counsell of lernet men y^t J myght gete in yis Cuntre J haue made
 yis award for y^e best for both y^e said parties and yaire heire³ to my
 discrecon@ be-cause y^t J myght haue no clere evidens of y^e ryghtwys
 boundes y^t oghet to haue benn ladde betwene y^e parties beforesaid
 betwene y^e mosses beforesaid and yis J take opon my charge as J
 wyll vnsuare before god in y^e dredefull day of dome Jn y^e wyttenes



of y^e queche a-ward to yies endentures J haue set my seale of
myn Armes Writenn on gode fryday next before y^e fest of pasch y^e
3ere of ye reigne of kyng henre ye sext after ye conquest y^e thridde